



Sesida dals

Communitgà ils

Protocol nr.

25 d'october 2022

28 d'october 2022

815/2022

### **Dumonda Natter**

concernent la realisaziun da la  
«Strategia concernent il spazi da viver gaud-selvaschina 2021»

### **Resposta da la Regenza**

La «Strategia concernent il spazi da viver gaud-selvaschina 2021» è l'element da basa per megliar en etappas fin l'onn 2035 la situaziun da gaud-selvaschina en il chantun Grischun. Cun la reducziun resp. la regulaziun da las populaziuns da selvaschina sto la chatscha prestar ina contribuziun impurtanta per cuntanscher las finamiras. Il svilup da las populaziuns da primavaira dals ultims 3 onns (2020–2022) mussa, che la midada da tendenza ha cumenzà e che la populaziun da tschiervs en il chantun sa diminuescha. Che las finamiras da chatscha tenor la Strategia concernent il spazi da viver gaud-selvaschina vegnian cuntanschidas, ha vinavant gronda prioritad per l'Uffizi da chatscha e pestga (UCP). Mo cun la regulaziun da la populaziun da selvaschina tras la chatscha na pon ils problems da gaud-selvaschina dentant betg vegnir schliads. Igl è cumprovà ch'igl è decisivas e necessarias er mesiras selviculturalas e la garanzia per spazis da viver adattads e senza disturbis per megliar la situaziun gaud-selvaschina.

*Tar la dumonda 1:* La «Strategia concernent il spazi da viver gaud-selvaschina 2021» è vegnida communitgada cun ina comunicaziun a las medias. Il UCP orientescha regularmain la vasta publicitad e las chatschadras ed ils chatschaders en comunicaziuns a las medias, en contribuziuns spezialisadas e referats davart temas da la chatscha. Actualmain lavuran l'Uffizi da gaud e privels da la natira (UGP) ed il UCP cun sustegn extern vi dad in concept da comunicaziun unitar per garantir a lunga vista la circulaziun da las infurmaziuns. Ultra dal chantun han er las vischnancas sco proprietarias da gaud ina funcziun impurtanta betg mo per sensibilisar la populaziun, mabain er per proteger en moda proactiva il gaud.

*Tar la dumonda 2:* La valur directiva da 10 dis chatscha speziala cun la pussaivladad da prolungar quella localmain en territoris da problems gaud-selvaschina è raschunai vla ord vista da la biologia da selvaschina, da la protecziun dals animals e da la planisaziun da la chatscha e stat en concordanza cun la «Strategia concernent il spazi da viver gaud-selvaschina 2021». Ina vasta prolungaziun da la chatscha senza resguard sin las cundiziuns externas influenzescha percunter l'aut standard etic, ecologic e da la protecziun dals animals da la chatscha grischuna e stat uschia er en cuntradicziun cun la strategia (cun la segunda finamira principala). Ina prolungaziun generala da la chatscha speziala, sco quai ch'ella era vegnida fixada l'onn 2021, ha ultra da quai mussà, ch'ina tala prolungaziun na chaschuna betg mo gronds disturbis sproporziunads en ils spazis da viver d'enviern, mabain ch'ina tala prolungaziun frunta er tar las chatschadras ed ils chatschaders sin malchapientscha. Ultra da quai maina ella las chatschadras ed ils chatschaders als cunfins da lur capaciad da prestaziun. Quai ha demussà er la preda modesta suenter il 10avel di da chatscha. Percuntanscher las finamiras da chatscha a vista mesauna fin lunga èsi decisiv, che las chatschadras ed ils chatschaders èn persvadids da las mesiras da chatscha e che la realisaziun è er realistica.

*Tar la dumonda 3:* La migraziun dals tshiervs è ina gronda sfida per la planisaziun da la chatscha en il Grischun. Durant onns cun solits moviments da migraziun funcziuna la chatscha speziala fitg bain ed ils plans da prelevaziun pon vegnir ademplids en moda effizienta, suenter l'immigraziun dals tshiervs en ils quartiers d'enviern. Tut tenor situaziun da l'aura u da la situaziun dals animals da rapina gronds poi esser, ch'ils tshiervs migreschan pir suenter ils 20 da december u insumma betg en lur quartiers d'enviern. Per ch'els na mitschian tuttina betg dal squitsch da chatscha e per ch'ils plans da prelevaziun vegnian ademplids, vegn il cumenzament da la chatscha speziala fixà decisivamain tras il status dals moviments da migraziun ed adattà a las cundiziuns meteorologicas. La flexibilitad necessaria per quest intent vegn concedida al departament specific tras la legislaziun chantunala da chatscha.



En num da la Regenza

Il president:

Marcus Caduff

Il cancellier:

Daniel Spadin